



АКАФИСТ ИЖЕ ВО СВЯТЫХ ОТЦУ НАШЕМУ ИОАННУ МИТРОПОЛИТУ ТОБОЛЬСКОМУ И ВСЕЯ СИБИРИ ЧУДОТВОРЦУ

Кондак 1

Избранный святителю Христов Иоанне, богопроповедниче преславный, доброголасный органе Духа Святаго, звездо, пресветлая, от Киевския Лавры возсиявшая, и страну Сибирскую осветившая, похвальными пении величаем тя, ходатая за нас пред Господем усердна. Ты же угодниче Божий, услыши моление всех нас вопиющих ти: Радуйся, святителю Иоанне, Тобольский и Всея Сибири чудотворче.

Икос 1

Ангелов Творец, и всея твари Создатель, избра ты от юности твоя на служение Церкви Своей Святей. Ты же блаженне, в малых летех сый, восприял ангельский образ, и добре подвизался еси в обителех иноческих, был, еси святитель Христов преславен, и данный ти от Бога талант, множицею у плодоносил еси, темже мы зряще,

похвальные труды твоя, воспеваем сице:

Радуйся, честная отрасли родителей
благоверных.

Радуйся, Церкви православная чадо пречестное.

Радуйся, яко прилагал еси сердце твое к
познанию закона Божия.

Радуйся, приобщивыйся равноангельскому
житию.

Радуйся, вместилище дарований Божиих.

Радуйся, отечества твоего Божественное
украшение.

Радуйся, архиерею Божий и учителю
премудрый.

Радуйся, светлыми подвиги твоими к Свету
невечернему вшедший;

Радуйся, святителю Иоанне, Тобольский и всея
Сибири чудотворче.

Кондак 2

Видяще тя отрока благонравна и ко благому
учению усердна, родители, твои вдаша тя,
книжного ради научения, во святую обитель
Киевопечерскую, идеже ты, прилежно учився,
воспевал еси Богу: Аллилуиа !

Икос 2

Разум твой в послушание веры пленив, ум к
Богу вперил еси, сего ради, Бог дарова ти

обильно благодать разумети писания духовныя,
да будеши во время потребно наставник добр и
руководитель на пути спасения. Мы же,
великому в юном возрасте разуму твоему
дивящися, взываем:

Радуйся, благому учению прилежавый;

Радуйся, разум Богопросвещенный стяжавый;

Радуйся, в духовном риторстве преуспевый;

Радуйся, земле благая семя Слова Божия
восприявшая;

Радуйся, алкавый и жаждавый единыя, точию
Божия правды;

Радуйся, яко писания святых отец познати
тщался еси;

Радуйся, яко уразумел еси глаголы жизни
вечныя;

Радуйся, от млада возраста храм Божий
возлюбивый;

Радуйся, святителю Иоанне, Тобольский и всея
Сибири чудотворче.

Кондак 3

Силою Вышняго утверждаяся, святе, во благом
желании твоем быти иноком обители

Киевопечерския, поучался еси день и ночь в
законе Господни, присно на молитве иноков
пребывая и купно с ними поя в Троице
славимому Богу: Аллилуиа !

Икос 3

Имея велию любовь к Богу, ты пламенно
возжелел еси восприяти образ, его же и
сподобился еси во обители Киевопечерстей,
идеже, яко чадо послушания, пребывал еси. Мы
же дерзаем ублажати тя за таковое
произволение пении сими:

Радуйся, яко ярем Христов на рамо взявший;

Радуйся, возревновавый житию преподобных
отец;

Радуйся, благоуханный крине девства;

Радуйся, яко мирскою лепотою не уязвился еси;

Радуйся, ни во что же вменивый суетная
удовольствия мира сего;

Радуйся, благимы делы, яко бисером
драгоценным, Себе украсивый;

Радуйся, яко тленная мира презрел еси, Богу же
Единородному работати возжелел еси;

Радуйся, тщету мирских попечений отринувый,
иго же Христова паче всего возлюбивый;

Радуйся, святителю Иоанне, Тобольский и вся
Сибири чудотворче.

КОНДАК 4

Бури, яже в мире, бегая во обитель
Киевопечерскую вселился, еси отче Иоанне,
идеже за многия подвиги в степень пресвитера
возведен, неустанно по вся дни проповедуя

Слово Божие, поучал еси люди закону Христову, призывая вся благоугождати Богу, взывая Ему: Аллилуиа !

ИКОС 4

Слышаша людие многое вещание
Богоглаголивых уст твоих, святче Божий, и
видяще иноческое житие и многотрудныя
подвиги твоя умиляхуся сердцем. Мы же дивяся
таковому дарованию и восхваляя святое житие
твое, вопием:

Радуйся, вместилище Божия премудрости;
Радуйся, провозвестниче православия во
обители Печернестей;
Радуйся, благодатными вещании сердца верных
услаждавый;
Радуйся, мудрый вразумителю
неправомыслящих;
Радуйся, взыскателю и верный указателю к
небеси пути теснаго;
Радуйся, всех неослабно благочестию поучавый;
Радуйся, славу Божию житием и словом твоим
проповедавый;
Радуйся, святителю Иоанне, Тобольский и всея
Сибири чудотворче.

КОНДАК 5

Боготечная звезда явился еси ты, отче Иоанне, в делании духовнем преуспевая, в назидание же и утешение верным, к писанию душеполезных книг зело прилежа. Сего ради поставлен бысть во архимандрита Свенския обители, в пределах Брянских сущей, и тамо воспе Богу: Аллилуиа !

ИКОС 5

Видяще ревностное служение и святое житие твое, архиепископ черниговския церкви святой Феодосий, восхотев имети тя в помощника себе, возва тя в настоятеля Елецкия обители, идеже ты добре наказуя и поучая братию, всем вся был еси. Сего ради мы тебе, яко делателю верну в вертограде Господни, приносим хваления сия:
Радуйся, мудрый учителю благочестия;
Радуйся, монастырских уставов ревностный блюстителю;
Радуйся, добре подвизающихся сорадователю;
Радуйся, благий подкрепителю слабых;
Радуйся, присный вразумителю нерадивых;
Радуйся, иноческаго жития образ показавый;
Радуйся, в постничестве, преподобии и правде Богу послуживый;
Радуйся, Божественныя законы соблюдый, яко добрый кормчий;
Радуйся, святителю Иоанне, Тобольский и всея

Сибири чудотворче.

КОНДАК 6

Проповедник и наставник преславен,
архимандрит предивен был еси, яко светильник
на свещнице горяй и светяй, вернии же людие,
наученнии тобою истинам веры христианския,
согласно пояху песнь хвалебную Христу Богу:
Аллилуиа !

ИКОС 6

Возсиял еси, яко звезда на тверди Церковней
направляя всех к высоте благочестия, темже, по
преставлении святителя Феодосия, избран был
еси во архиерея церкви черниговския. Мы же,
радуясь такому изволению Божию и тебе,
восклицаем сице:

Радуйся, чистый сосуде, в онъже излился
архиерейства благодать;

Радуйся, словом, житием и писании Своими ко
Христу приводяй;

Радуйся, яко тщался еси на всякий день в храме
Божием службу совершати;

Радуйся, яко в уединении келейном всенощныя
молитвы творил еси;

Радуйся, милостивый питателю сырых и
беспомощных;

Радуйся, людям русским победу над свеи

предрекий;

Радуйся, архиерею святой, дара прозрения от Бога сподобивывайся;

Радуйся, благий делателю винограда Христова;

Радуйся, святителю Иоанне, Тобольский и всея Сибири чудотворче.

КОНДАК 7

Хотя явити ты служителя Божия веры и Богу угодна святой святитель Феодосий Углицкий в видении чудном явился ти болящу, рекий: «Не скорби, брате: Господь услыша молитвы твоя, да будеши здрав, возстани с одра болезни, приуготови себе литургию Богу совершити», и исцели ты, вопиюща Создателю всех: Аллилуиа!

ИКОС 7

Дивное показа знамение Господь, егда лежащу ти на одре болезни, явися тебе, по Божию изволению, святитель Феодосий, проразумев в сем явлении милость Господню к тебе и скорое исцеление от недуга, ты повелел еси вся потребная к служению твоему в храме уготовати. Зело изумевашеся и дивляшеся пресвитер храма того рек: «Како приидет, не могий ходити?» Но ты, святителю Божий, от одра своего абие воспрянув, в храм Божий пришел и реченное служение совершил еси. Мы

же такому явлению Божией милости к тебе
дивящся, во умилении зовем ти:

Радуйся, в тяжцей болезни николиже
возроптавый

Радуйся, непостыдну надежду на Бога имевый

Радуйся, яко на одре болезни Богу пламенне
молился еси;

Радуйся, от болезни чудесне исцеленный;

Радуйся, святителем Феодосием, по Божию
изволению, дивно посещенный;

Радуйся, образ честен святителя Феодосия с
благодарными письмены устроивый;

Радуйся, о Святости святителя Феодосия
прорекий и над гробием его почтый;

Радуйся, Святостию жития твоего просиявый;

Радуйся, святителю Иоанне, Тобольский и всея
Сибири чудотворче.

КОНДАК 8

Странно бо зрети, егда ты, святителю Иоанне,
ярем служения апостольскаго несый подъял еси
труд дальняго пути во страну Сибирскую, да
научиши и тамо люди воспевати Триединому
Богу: Аллилуиа !

ИКОС 8

Весь был еси, святителю, преполнен любви к
Богу и послушания, неисповедимой воле Его.

Сего ради егда поставлен был еси в митрополита хладныя Сибири, шестидесяти лет сый, бодренне последовал еси в кафедральный град твой Тобольск, вернии же людие Сибирстии с радостию сретаху тя приветствии сими:
Радуйся, смиренномудрый исполнителю неисповедимых Божиих судеб;
Радуйся Аврааму патриарху подобне, во страну безвестную и дальную, послушания ради, пришедый;
Радуйся, крест свой на рамо подъявый и тем амалика мысленнаго силу низложивый;
Радуйся, неустанный проповедниче православия;
Радуйся, пресветлая звездо ко Христу приводящая;
Радуйся, святую икону Пречистыя Богородицы путеводительницею себе имевый;
Радуйся, во град Тобольск на праздник Успения Божия Матери прибывый и, лета некая пожив, в граде сем блаженно почивый;
Радуйся, за труды и подвиги твоя от Бога zde прославленный;
Радуйся, святителю Иоанне, Тобольский и всея Сибири чудотворче.

КОНДАК 9

Всякия труды подъял еси яко архипастырь добр
Сибирския митрополии и отец любвеобилен,
вверенныя ти люди мудре упасл еси, сам
непрестанно поучая, побуждаша же иереев
Слово Божие проповедати, да научат и
неведущих пети Богу:Аллилуиа!

ИКОС 9

Витийство человеческое не довлеет по
достоянию, восхвалити подвиги твоя, труды и
многия благодеяния, яве и тайне. Мы же,
вспоминая святое житие твое и велие
милосердие, величаем тя глаголюще:
Радуйся, молитвинниче и постниче, всего Себе
Богу просвятивый;
Радуйся, струя Божией премудрости
приснотекущая напаяющая верных;
Радуйся, яко пресветлый лик твой озаряеши
радость духовная, яже сообщашеся сердцам
людей благочестивых;
Радуйся, помощниче бедне живущих и в скорбех
сущих;
Радуйся, зело потрудивыйся на ниве Христовой;
Радуйся, Пречистыя Богородицы икону, юже в
пути имел еси, в келлии своей честне
поставивый;
Радуйся, пред сею иконою за паству свою и весь

мир православный неустанно моливыйся;
Радуйся, предстателю о нас пред Господем
непостыдный;
Радуйся, святителю Иоанне, Тобольский и всея
Сибири чудотворче.

КОНДАК 10

Спасение роду человеческому устраяяй, Господь
яви тя, угодниче Христов, просветителя
Сибирския страны, многое бо множество людей
от языка остятскаго, самоедскаго и вогульскаго
потщался еси привести в познание истины, да
уразумевше Евангелие правды и соединившеся
Святей Православней Церкви, купно с нами
вопиют Христу Спасителю: Аллилуиа!

ИКОС 10

Стена тверда был еси, святителю пастве твоей ,
охраняя ю от ересей и раскола, поставляя для
сего от гор Уральских, даже до вод Великаго
океана, по градом избранныя священноиноки,
да наблюдают повсюду чин церковный. Таковая
Твоя деяния и неустанныя труды
вспоминающе, зовем ти:
Радуйся, града Тобольска и всея Сибири
похвало;
Радуйся, ко спасению добрый путеводителю;
Радуйся, велие светило церковное, яко светлая

луна в ночи, мрак раскола и идолослужения разгоняющее;
Радуйся, ревнителю подвигов апостольских;
Радуйся, в сих подвизах друга себе схимитрополита Феодора имевый;
Радуйся, ревностный рачителю благовестия Евангельскаго разноплеменным языкам Сибири;
Радуйся, столпе непоколебимый православныя веры;
Радуйся, яко святая душа твоя обитель бысть Богу;
Радуйся, святителю Иоанне, Тобольский и вся Сибири чудотворче.

КОНДАК 11

Пение всеумиленное Богу приносим егда помянем блаженную кончину твою, пред образом бо Пречистая Богородицы с Предвечным Младенцем в келлии своей. Колена преклонив, ты, святителю, на молитве Богу душу предал еси, мощи, же твоя, якоже ты заповедал еси, в соборном храме во алтаре преподобных Антония и Феодосия Печерских погребоша, воспевая Богу: Аллилуиа!

ИКОС 11

Света невечерняго зрителю, ты от Господа сугубо прославлен еси, иже и святым мощем

твоим неоскудно благодать исцелений дарова,
еже по всей стране Российстей известися, и
бысть торжество дивно во граде Тобольском,
егда из недр земных святых мощи твоя,
святителю Иоанне явлены быша людем
православным. Сбращася тогда вкупе архиереи
мнози, клир церковный и велие множество
людей боголюбивых окрест храма и на стогнах
града, вси ликоваху и умильно славословяху тя;
приими и от нас пение сие:

Радуйся, исшествие твое от земнаго жития
предведевый;

Радуйся, в день преставления своего, литургию
Божественную велелепно совершивый;

Радуйся, в день он, по литургии трапезу у себе
людем духовным и нищим уготовавый и им при
трапезе сам послуживый;

Радуйся, многотрудныя подвиги твоя святолепно
в теплей к Богу молитве скончавый;

Радуйся, святую икону Пречистыя Богородицы в
благословение людем православным во граде
Тобольском оставивый;

Радуйся, яко безплотными трисвятую песнь Богу
немолчно воспеваеши;

Радуйся, наследовавый селения небесная, идеже
вечнаго веселия наслаждаеши;

Радуйся, из мира Горняго многажды явлением
своим людем страждущим чудесне помощь

явивый;

Радуйся, святителю Иоанне, Тобольский и всея Сибири чудотворче.

КОНДАК 12

Благодати Божией тезоименит сый и оная преисполненный, огнезрачному Божества престолу ныне предстоя святитею Иоанне, с Пречистою Богородицею Христу о нас молишися, со святыми Тому поклоняешися, с преподобными ликуеши и со ангельскими чинми радостно поеши: Аллилуиа !

ИКОС 12

Поюще дивная и преславная жития твоего труды, подвиги, блаженную кончину и чудеса, светло празднуем святую память и прославление мощей твоих, святителю Христов Иоанне, умильно просим тя, не забуди нас сие величающих тя:

Радуйся, Сибирския митрополии велия звездо;

Радуйся, от Господа по достоянию, прославленный на небесех и на земли;

Радуйся, молитвенниче к Богу непостыдный;

Радуйся, преславный угодниче Христов;

Радуйся, яко от святых мощей твоих людем

верующим дарова Господь исцеления многая;

Радуйся, врачу предобрый недугов душевных и

телесных;

Радуйся, града Тобольска и всея Сибири
небесный покровителю;

Радуйся, присный наш наставниче, славою
небесною украшенный;

Радуйся, святителю Иоанне, Тобольский и всея
Сибири чудотворче.

КОНДАК 13

О, предивный святителю Христов Иоанне, в
вышних селениях со святыми пребываеши, не
остави нас, в мире сем сущих, буди присный
наш заступник пред престолом Господа
Вседержителя. Молися выну о всех нас, да
сохранит нас от всяких бед и напастей, наипаче
же от искушений, на ны находящих, и от
напрасныя смерти. Да поможет нам Господь на
пути странствия земнаго, веру свою
православную невредиму соблюсти, тихо и
безмятежно в благочестии пожити, и тако , в
жизни христианстей преспевающе, мирныя
кончины zde и жизни райствия на небеси
сподобитися и воспевати благодарственно песнь
всех Создателю Богу: Аллилуиа!

Трижды.

Молитва

О, святителю Христов Иоанне, Божию престолу со Святыми предстояй. Ты еси отец наш любвеобильный, и молитвенник наш теплый. Умоли Господа Бога, да подаст нам коегождо потребе полезная: скорбящим утешение, немощным здравие, заблуждшия да наставит и обратит на путь покаяния, распри и раздоры умирит, неведующие Христа люди на путь спасения да обратит, и всех нас единением духа и любви в единой Святей Своей Церкви соединит. Да сохранит нас от глада, града, труса, потопа, огня, меча, междоусобных брани и напрасных смерти, наипаче же от искушений, облегающих нас в жизни сей, да дарует нам мирное пожити zde житие и веру Свою православную невредиму соблюсти.

О святой угодниче Христов, архипастырю предобрый, молитвенниче наш неусыпный! От юности всего себе Богу посвятив, равноангельное житие стяжал еси, исполнен бе радости духовных, яже озаряше светлость лика твоего и сердца верных утешаше: по истине бе светильник горяй и светяй, святолепно пожив, от Господа сподоблен бе дара прозрения, время кончины своя предуведа. Моляся пред образом Пречистыя Богородицы, коленопреклоненне преставися. Ныне проси Ю о нас, да будет нам

покровительница в сей многотрудней жизни и в час кончины нашея да умолит Всеблагаго Господа сподобитися нам в лице благоугодивших предстати Престолу Его и восхвалити в Троице славимаго Бога, Отца и Сына, и Святаго Духа во веки веков. Аминь.

